



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:


- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

ORATIO PANEGIRICA
 QUAM
 IN LAUDEM
 EGOLPHI A KNOERINGEN
 EPISCOPI QUONDAM AUGUSTANI

DIE EJUSDEM ANNIVERSARIA
 XI. MARTII M.DCC.LXVIII.
 ANGELOPOLI IN TEMPLO ACADEMICO
recitavit
 ADAMUS WEISHAUP
 LEGUM p. t. STUDIOSUS.



INGOLSTADII
 Typis JOANNIS CAROLI GRAN, Typographi
 Academici.



ORATIO.

RECTE ac sapienter A. A. volnerunt Majores nostri, ut quæ a viris summis in hac Anglipolitana essent immortaliter gesta, ea publicos quosdam factorum suorum præcones nanciscerentur, qui dicendo nobis & debiti nostri quantitatem exhiberent, & virorum simul omni ævo immortalium memoriam animis nostris restituerent. Ego licet nec annis nec officii dignitate, nec sermonis gravitate ad oratores illos me vel tantisper accedere ultro profitear: Illud tamen, cum hocce studiorum meorum curriculo innata quadam sciendi atque auscultandi cupidine in hanc ædem sacram hoc ferme tempore me frequenter conferrem, sæpe veluti indignabundus deprehendi, multa quidem ab illis nova, multa illustria coram asserri, quibus tamen una loci atque temporis importunitas multum de venustate sua, multum de auscultatione vestra detraheret. Id enim ab illis continuo actum iri repetita attentione animadverteram, quod argumentum quoddam a tempore, ab institu-

to majorum alienum omnino arripiant : tum vero ubi mox suggesto discessuri forent , nomen quoddam illustre aliquoties inclament , ut eo solo divinaretis . , de quo facto , de quo viro ipsis dicendum fuisset , si tempori & loco magis quam genio suo indulgere maluissent. Illud præterea homines illi multo cæteroquin nomine insignes gravissime peccant, quod in viros tantos, quorum laudes pro viribus assequi debuerant, iniqui plane atque injurii existant, quasi ab illis non gestum, non scriptum fuisset, quod vestra auscultatione satis dignum vobis coram proponerent.

Ego quidem P. A. ut primum in laudem EGOLPHI KNOERINGII, cujus viri hodie diem anniversariam agimus, Vicario nomine differendi provincia a vobis mihi delata fuisset : id continuo in animum induxi, ut primitus, habiti mihi tanti honoris grates publicas vobis referrem, quod me hominem novum atque juvenem, & dicendi omnino expertem ex tanta felicissimorum ingeniorum ubertate unum delegissetis, quem viri tanti atque immortalis *εὐνομίας τὴν* destinaretis. Tum vero ubi ignorantiam meam essem deprecatus, ad secundas me curas converti, ne quid ex imbecillitate mea maculæ potius quam gloriæ in EGOLPHUM proficisceretur. Diu igitur gravissime mecum luctabar, quid in viro summo, ubi omnia summa essent, maximum exhibere vellem. Videbar mihi in hortum quendam & sui pretio, & rerum amantitate ac varietate singularem adeo fuisse delatus, ut oculum huc illucque vagantem diu veluti suspenderet, quo primo, quove ultimo se fascinaturo vellet : Cum illi qui ante me huc ad dicendum ascenderant, illic non nisi dumeta & vepresprehendissent. Illi quod de EGOLPHO dicerent, sibi deficere querebantur, ego ubi ordiar, ubi finiam, quid prius, quid

❧ 3 ❧

quid postremum verbis exornem, anxius disputo. Multa de EGOLPHO Herbipolenses, plura Augustani stupenda praedicant: propiora tamen huic Academiae se offerunt, quam Magistram suam singulariter adeo complexus est, ut eam vivus adhuc lectissima librorum suorum substantia locupletaret. Nihil amori tanto fuga temporum, nihil absentia, nihil dignitas Praefulis Augustani detraxere: id potius agitabat, ut quo plus annis, quo plus dignitate, eo magis etiam studio atque amore erga Anglipolitanam cresceret. In hoc mihi proximus intuenti vicit deliberationem cogitatio: EGOLPHUM uno hoc facto tantum ad immortalitatem suam fecisse, ut si illum historiae Praefulem minus ferventem, litteratorem minus celebrem exhiberent, ejus tamen existimatio, apud omnes aequos rerum aestimatores summa, & non nisi ultima hujus orbis necessitate interitura fuisset.

Date hoc A. A. viro summo, & in tantam liberalitatem vestri studio profuso, ut qui vobis adhuc nascituris jam provide consuluerat, eidem hocce temporis benevoli impendatis, quod lineolis hisce ejus immortalitati consecro.

Quo ad modum anno ad hoc athenaeum EGOLPHUS accesserit, quantumque temporis ibidem in studiis collocarit, commune saltorum nostrorum silentium est. Nec ego in re dubia adeo atque ancipiti certi quidquam definire ausim, cuius determinandae spes exigua apparet, nisi Academiae documenta, proximiora quaedam doceant, quae desuper inspiciendi facultas mihi deficit. Illud certum est, id sub medium saeculi decimi sexti contigisse, cum ROTHMARUS auctor sit, eum anno ejus saeculi sexagesimo Angelopoli Friburgum Brisgoiae migrasse. Erat illis annis is Academiae hujus splendor,

dor, eaque existimatio, ut omnes ex omni orbe scientiæ in eam solam confluisse viderentur; erat tantus discentium confluxus, ut nulla gens humanior, nulla ferme provincia remotissima licet, inventa fuerit, quæ non conterraneos suos Ingolstadium ablegasset, scientiæ insigniter haustæ fructus im-
mensos in patriam relatu-
ros.

Date jam A. A. date hanc Oratori vestro veniam, ut tantisper a tramite suo declinet, mox in eum rediturus, geniove paulisper satisfaci-
at. Neque enim continere me possum, quin virorum tantorum memoriam vobis restituam: ita me amor vestrum omnium, ita gloria vestra me urgent. Neque id EGOLPHI laudibus quicquam detrahet, si dicendo commemorem, quantis Magistris vir tantus profecerit.

Erat sub id tempus Facultas sacra, uti etiam temporum illorum ratio postulabat, quot Doctorum, tot quasi Deorum feracissima. BALTHASAR FANNEMANUS ex ordine Prædicatorum Episcopus Missiensis & Suffraganeus Hildeshemiensis pro Deo & fide patriæ exul: GEORGIUS THEANDER Aubinganus Bo-
jus, uno postea anno Rector, Vicecancellarius, Antecessor & Parochus: MICHAEL WAGNERUS Ræthus pro fide orthodoxa contra vicinam adeo & in ipsa pæne Bavaria domesticam Lutheri hæresin e cathedra argumentorum invictissimorum robore ac vi fortissime depræliabantur. His veluti in auxilium dati, non quod illi soli sibi non sufficerent, sed quod vis conjuncta fortior esset, venerant ex Belgio a Serenissimo Duce ALBERTO huc ad nos evocati invictissimi Christi Athletæ Patres e Societate Jesu, ALPHONSUS SALMERON Hispanus Bibliorum Interpres, & Ecclesiæ in Concilio Tridenti congregatæ communis admiratio, PETRUS CANISIUS
vel

vel sola nominis sui recordatione & hæresi e terris Bavaris feliciter pulsa omnino summus, NICOLAUS GAUDANUS & JOANNES CUWILLONIUS Insulensis Flander. In Legum interpretatione versabant FRANCISCUS ZOHANNETTUS Patricius Bononiensis & in Alma quondam Bononiensi Ordinarius. BARTHOLOMÆUS ROMULEUS Nobilis Florentinus, WOLFF-GANGUS HUNGERUS & NICOLAUS EVERHARDUS, cujus hic tumbæ insisto, & quem monumenta hæcce ex utraque hac parte erecta virum summum me altius inclamant. Ex Facultate saluberrima unum JOANNEM AGRICOLAM HAMMONIUM nominasse sufficiat, virum omnino *ὁμολογῶν* & plurimis elucubrationibus insignem. Fallor, aut Philosophiæ, artiumque liberalium, cum his omnibus super nominis fama, atque summorum Doctorum provenio, acerrima quædam concertatio extitit? date mihi A. A. hominem illum & criticum summum VITUM AMEBACHIUM Wembdingensem nequidem nominis compellatione cognoverit! Parum ille sciverit, qui PETRUM APPIANUM ignoret, quorum hic in Mathematicis, ille in Aristotele interpretando sub id tempus versabantur, insuper JOANNES BORICHIUS Græcam, PAULUS ÆMILIUS Romanus Judæus linguam hebraicam, JOANNES PEDIONÆUS Oratoriam atque Poeticam profitebantur.

Atque hæc erat Angelopolitanæ nostræ facies, hic splendor, qui EGOLPHUM laribus patriis, ab illustrissimorum parentum complexu huc ad nos evocarat, non sine quodam Numinis asslatu, ut magni omnes uno tempore in unam urbem confluerent. His Magistris spiritum immensum explicuit, horum alis ad æternitatem eniti, & sepulchro altius jacere dicit!

Hæc

Hæc quam illustria cuidam videantur, fuere tamen aliqua, quibus Angelopolitana adhuc laborare EGOLPHO sedulo notabatur. Noverat ille, quid enim viri ejus industriam subterfugere potuisset? noverat ille, quantum e re Academicarum sit, illas Bibliothecis publicis esse instructas. Noverat ille, nihil dignius, nihil prius antiquiusve homini litterarum suam omnem exerceat. Neque illud ignorabat, qui gentium omnium omni tempore in ea re conatus & labores extitissent. Non noverat modo, quin continuo consilium caput regium illud atque gentis PTOLEMAICÆ æmulum trophæum quoddam non ex ære, non gentium devictarum spoliis, non super urbium bello everfarum ruinis, sed maxumorum virorum ingeniis extruendi, ut aliquando haberet, quo in Angelopolitanam suam regie ac utiliter prodigus essent. Erant enim id temporis *Ingolstadii* Bibliothecæ omnino nullæ, licet privati, quorum etiam consilio in coemundis libris EGOLPHUS multum adjuvabatur, adeo φιλοβιβλοι essent, ut librorum conquirendorum studio vix non insanire viderentur.

Dum hæc animo moliretur, subito *Angelopoli* cessit, *Fri'urgum Brisgoiæ* studiorum ergo petiturus, cujus tum insignis fama ab HENRICO GLARCANO erat: ibi cum eo viro græce latineque doctissimo aliquo tempore familiarissime usus esset, eo GLAREANUM permovit, ut magna auri substantia numerata librariam supellectilem in se transferret, hæc tamen lege, ut ejus utilitas, quoad viveret, penes GLAREANUM foret. Hoc tamen parum adeo orexin suam EGOLPHUS expleverat, ut ipse potius doctissimorum hominum labores coram conquireret. Abiit Italiam, & in mediam adeo Romanam ibi non in Cardinalium modo colloquium, & amicitiam ultro

ultra admittus, sed summi quoque Pontificis favorem ita obtinuit, ut Comitis Palatini Lateranensis dignitate ab illo ornaretur. Roma Italiaque perlustratis, Belgium, inde Imperatoris quoque aulam invisit, in qua ut Rothmari verbis utar, nemo ex Proceribus aulicis tanti vel nominis, vel authoritatis, vel generis splendoris erat, qui non de KNOERINGIO præclare sentiret, ejus amicitiam exoptaret, contractamque sancte coleret: eam denique existimationem sibi conciliaverat, tot amicos conjunxerat, ut posteris temporibus raro ejus ædes præclaris hospitibus carerent. Accedit, quod Imperator itidem, ut summus Pontifex Comitis Palatini dignitatem, aliasque immunitates in eum contulerit. Has ille regiones & sciendi, & aliis benefaciendi studio perlustrat, O grandem, o beneficam animam, quæ aliorum amore terra patria se ultra contineri non patiatur, quæ si vel trans orbem fuissent, quæ suis prodesset, vel trans orbem cucurisset!

Ita libris & dignitate feliciter auctus, Belgio, Italia & Germania perlustratis: tandem peregrinationibus modum posuit, ad res domesticas rediturus, ut se totum Deo, Ecclesiæ, humano generi, optimis artibus, & tandem Anglicanæ suæ consecraret: atque ita se consecravit, ut thesauri sui tot laboribus, tanto auri dispendio, tantis viarum anfractibus conquesti usu longiore ultro ac penitus se abdicaret, eumque in alios transferret, quibus opum & rei familiaris penuria solidiore, scientiarum acquisitione interdicerent. Bibliothecam igitur suam ex GLAREANI insignis Historici libris primitus comparatam, tum novorum quoque voluminum accessionibus egregie auctam Ingolstadianæ Academiæ vivus donavit, eamque omnibus, ad communem studiosorum usum patere voluit: Denique annuos constituit redditus, quæ Bibliotheca-

bibliothecarius ali, Bibliotheca conservari, augeri, & locupletari possit.

O summum, o extremum regiae etiam munificentiae gradum! EGOLPHE ut aliis bene esset, pretiosissimis te ipsum facultatibus exuebas! aut si cui hæc minora videantur, quid denique homini illi magnum quid æternitate dignum videbitur? Ego sane A. A. neque enim quicquam dissimulare vellem, quod frustra dissimulavero, facti hujus splendore ita me commoveri profiteor, ut virium, quarum tamen in dicendo usus foret, vix ac ne vix quidem in me quicquam superlit. Video enim in hoc uno tanta tamque illustria contineri, ut dies me dicentem deficeret, si vel aliquam eorum partem pro meritis exequar. Ea igitur attingam, quæ primis ut vocant labris, rem gustanti prima se sistunt, ac veluti invocata occurrunt.

Erant id temporis, atque utinam ævo nostro nunquam existerent! adolescentes lectissimi ingenii acumine, & ceteris animi dotibus felicissimi: sola tamen fortunæ calamitate, atque invidia ita oppressi, ut nec alimentorum, nec litterariæ suppellectilis quidquam proprium haberent. Quid agerent juvenes miserrimi? Urgebat ingenii facilitas, judicii maturefcentia, memoriæ pertinacitas, ut singulari quodam æstro ad optimas artes raperentur: obstabat, ac veluti magnis ictibus ab ostio sapientiæ repellebat; inopia, fames, ac extrema adeo egestas. Quid agerent? quos Numinis clementia animi dotibus priores multis, fortunæ invidia divitum ludibrio ac derisu inferiores collocavit? recederent a sapientiæ firmissimo complexu, ac ad infima quævis sese reciperent, modo illis etiam mediis ab egestate se tantundem auferrent?

Hoc

Hoc certe reliquum fuerat, nisi EGOLPHUS beneficio suo plusquam regio, illis inopiæ levamen, sibi immortalitatem dedisset! horum infortunio condoluit, & ut quicquam malorum illis subduceret, vivus repetita donorum profusione, mortuus hac litteraria suppellectile consuluit, ut certis diebus hoc maximarum animarum Pritanæum accederent, & virorum summorum ingenia super fatis suis explorarent. Horum gemitus, quos liberalitate sua sæpe suppressit, hoc viro summo summum humanitatis officium extorserunt; hæc aternitatem illi conciliarant, quam a propriæ gloriæ studio aut domesticis rationibus frustra expectaturus fuisset.

Sed ut hæc minora videantur, alia videlicet efficiunt, quæ majora insequuntur. Cum enim ipse ulterius beneficiæ studio progredi non posset, id etiamnum exemplo suo effecit, ut benefacta hæc sua veluti ingens quidam fluvius aliorum accessione ultra ripam quoque se attollerent. Nam contigit: ut exiguo post ipsum tempore ingentia nomina ALBERTUS HUNGERUS & MARTINUS EISENGREINIUS Stuttgardianus, quorum hac in æde sacra me cineres audiunt, RUDOLPHUS item CLENKIUS, & recentissima vestrum omnium memoria GEORGIUS HAGENIUS nuper admodum fato felicissime functus, pro suo in Academiæ nostram fervore illum letissimæ suæ librariæ suppellectiles hæredem testamento scripserint: quibus accessionibus Bibliotheca nostra exiguo temporis lapsu ad tantam magnificentiam accrevit, ut librorum tum impressorum, tum manuscriptorum codicum, & vetustate, & raritate, & quantitate omnes ferme Germaniæ Bibliothecas solam Vindobonensem si excipias, impune provocet. Cujus asserti mei & rationes multas asserere possem, & multum roboris adderem, si singularum Facultatum thesau-

ros

ros dicendo percurrendi animus mihi foret. Illud solum dicam, quantum in glotticis præstemus: neque enim temporis præfixi angustia patitur, ut quantum etiam vellem, ad reliqua converterar, quæ æquum rerum æstumatorem intuendo magis, quam recitando persuadeant. Hoc solum tacitus præmittere non possum, tum quod peregrinæ hujus suppellectilis præne incredibilis nobis contigerit copia, tum quod ex illa singulare quoddam ornamentum Bibliothecis accedat. Quæ igitur ora, quæ Europæ vel Asiæ provincia, quæ non partem aliquam in hac linguarum farragine haberet? sunt enim nobis non ex occidente solum plurimarum linguarum idioma chartis manu vel typo impressa, Galliæ, Italiæ, Hispaniæ, Belgii, Angliæ, Hiberniæ, Poloniæ, Bohemiæ, Serviæ, Slavoniæ, Hungariæ, & Illiriæ: sed ex ipso adeo Oriente Græci, Hebraici, Arabici, Chaldaici, Syriaci, Sinici, Turcici, Æthiopici, Persici, & Armenici. * O vere turris Babel, non impiorum vesania, sed hominum summorum sollertissima indagatione constructa! quantum tibi lustri, quantum augmenti cum Clenckiano thesauro accessisset, quem certo mihi constat aliorum in hac urbe detineri. Atque hæc mihi leviter exploranti in linguis se offerebant, erunt fortasse ampliora, quæ indutriam meam subterfugere maluerant, ne ulteriori Elencho mihi aliquid fidei apud vos decederet.

Atqui hæc omnia unius hominis vel labore, vel auctoritate saltem, atque exemplo ad nos pervenerant. O nos rerum tantam

- * Nemo quis facile crediderit, fore vitum aliquem, qui hac peregrina suppellectile uti possit. Contigit tamen singularis universitatis bono, ut modernus S. Scripturæ Professor Bibliothecæ Academicæ proficeretur, qui solus longo post tempore tantarum linguarum usum facere potest.

tantarum possessione felices! o feliciorum illum, qui hac librorum suorum farragine æterna in simul suæ scientiæ documenta ad nos transmiserit! Enimvero qui multa de viro quodam litterato, qui illius scientiæ ambitum intimius rimari velit, is relictis ab eodem libris perlustrando gnaviter inhæreat: sunt enim illi argumenti instar efficacissimi, quo de mortuorum eruditione evidentissime conjiciamus. Adeo ut si nihil historiæ de KNOERINGIO prædicarent, nisi quod traditio Bibliothecam hanc esse ferat, hoc uno judicaturus forem virum illum, qui tot & tanta collegerit, fuisse summum.

Ego certe, quoties Bibliothecam hanc, *nostram gloriam* ingredior mortalibus cum immortalibus ad momenta aliquot conversaturus, videor mihi virum illum, quem sæpe jam immortalem compello, deliciis suis acriter incubantem intueri: ut divinos illos Codices volutat, ut in ambiguis ejusdem locis, sanctorum Patrum, aut Ecclesiæ mentem consulit. Vides Basilii & magni illius Gregorii gravitate ac splendore, Theodoretum in dicendo Comitatus, Tertulliani vi, Clementis varia ac incredibili scientia, Hilarii Cothurno, Chrysostomi melle, Augustini acumine, Hieronymi cælesti in scribendo ardore, & singulari omnis antiquitatis & linguarum peritia, magnam illam atque excelsam animam præparari, quæ aliquando Sedi Augustinæ tanta nominis sui celebritate præfuerat. Video te EGOLPHE hominum actiones, ad æquissima, simul & latinissima Pandectarum volumina ponderantem: video te apud instar scientiarum, atque artium omnium veneres ita delibantem, ut nec illas excluderes, quas multi ævo nostro nolis vitio dant, dum temporis in illis inaniter collocati repetundarum reos nos agunt: nil adeo vile, nil abjectum in libris deprehenderas, quod non felicissima quadam metamorphosi

phosi in usus tuos converteres: Audio te denique cum in græcis latinisque litteris te continuum animadverto, sciolis ævi nostri, atque omnis græcanicæ eruditionis contentoribus, Erasmianum illud fortiter atque assidue acclamantem: *Hoc unum expertus video, nullis in litteris nos esse aliquid sine græcitate.* Neque ab his tuis adhortationibus; hodiernum quiquam temittis: tu Primipilus viris omnibus, qui post te erant, facem prætuleras, tu signaculum immortalitatis adipiscendæ prior extuleras. Tuum igitur est, quod ex Athenæo nostro, veluti equo illo Trojano tot viri summi descenderint, ac etiamnum descendant: Tuum est, quod difficilem illum sapientiæ tramitem omnibus æqualiter complanaveris: Tuum est, quod fortunæ invidia oppressi homines animos ita feliciter excolant, de cujus cultura antea inviti, ac flentes desperabant, priusquam tu maximus ille Apollo fortunæ iniquitatem fortiter adeo veluti pugno percuteres. Tuum est, quod Angelopolitana hæc libris atque existimatione tantum accreverit. Tuum est, quodcunque Doctorum quorundam benevolentia in nos proficiscetur potest. Tua hæc sunt omnia atque erunt perpetuo tua.

Tu quidem excelsa anima, soluta parte tui imbecilliore, de terra, de morte ipsa, quamdiu venientem magna animi præsentia atque perseverantia provideras, multum triumphasti! quod in te Caducum, quod in te corrumpi poterat, partem ejus morbi biennalis vis paullatim consumpsit. Quod e morbo restabat, tellus jam tenet. Sed vivis adhuc, & plus adhuc vivis quam si præsens hanc auram duceres: Tu in ore, tu in animo eris omnium, nominisque magnitudine orbem universum, diuturnitate famæ vastam temporum profunditatem æquabis. Vivis adhuc, & ducentis jam ferme annis post fata vivis:

vivis: non enim tibi sed Anglipolitanae tuae vivere volueras: Hanc quod amares, quod illi prodesse, vitam tuam dicebas. In hanc vitam nec vetustatis injuria, nec fuga temporum quidquam possunt. Fecisti aliquid, quod sit vetustate fortius, quod tempore firmitus. Hoc nunquam tuum desinet esse. Vivunt haec tua beneficia, tu in illis, atque in dies se magis exlerunt. Atque utinam thesaurus ille tuus integer ad nos pervenisset! sed bellorum iniquitas, & belligerantium non humana rabies id efecerunt, ut beneficii tui magnitudinem reliquiarum quarundam quantitate metiamur. O thesaurum ingentem in re aeterna non aeternum, qualem te dicam antea fuisse bonum, tales cum sint reliquiae! O gentem barbaram! cui in vivos saevisse parum sit, nisi insimul mortuorum hostium conatus, atque aliquam substantiae tuae partem illasam nobis Deus servavit, magno sane argumento, non beneficiis tuis, sed tibi soli a nobis honorem esse habendum, non quod liberalis & utiliter prodigus, sed quod virtute & scientia summus fuisses. Salve igitur, salve stator artium, atque meo ore adstantium omnium voti suscipe, & si quidquam humanae cogitationis in te est relictum, si tuorum adhuc curam geris, quos vivus tenere adeo complexus fueras, oculos tuos ab aeterna illa bonorum omnium affluentia tantisper revoca, & quandoque huc in nos converte. Vigila super hoc Aethenae, & super amplissimis hisce viris, qui tui studio, atque amore huc laudes tuas auscultatum confluerant. Vigila, & interea usque dum aeternitas nos tibi jungat, salve, ave, & vale.



